

---

## COMUNICÂT STAMPE

PRIN TE CATEGORIE "SOCICULTURÂL" DAL PREMI MEDIASTARS

# SÎT WEB ARLEF AL VINÇ PREMI NAZIONÂL PE COMUNICAZION

Realizât de agenzie udinese direWeb al è stât sielzût jenfri 772 progjets

Udin, ai 21 di Fevrâr 2013 - Il sît web de ARLeF- Agenzie regionâl pe lenghe furlane, realizât de agenzie udinese direWeb, al à vinçût un dai premis nazionâls plui impuartants tal setôr de comunicazion.

Il sît [www.arlef.it](http://www.arlef.it) al è di fat il prin classificât te sezion internet - categorie "socio culturâls" - dal "Premio Mediasstars", che al conte iscrîts impuartants e innomenadis agenziis pubblicitariis, cjasis di produzion e post-produzion audiovisive e web factoring.

ARLeF e promôf e e da la sô poie a iniziativis inmaneadis di bande de Regjon e di altris aministrazions publichis dal Friûl Vignesie Julie in materie di tutele de lenghe furlane e promoziun dal so ûs in dute la comunicazion de vite moderne.

direWeb e à curât la sô gnove imagine on line propit in clâf contemporanie. "O vin vût a ce fâ - al spieghe Andrea Del Gobbo - cun contignûts culturâls aprofondîts, che a van des notis storichis e linguistichis fin a informazions su teatri, musiche, leterature, cine, e o vin cirût di proponiju tes diviersis areis dal sît sot forme di imagjinis e simbui. Il risultât al è chel di pandi i valôrs de storie e de culture furlane e lis funzions davueltis de ARLeF ancje a un visitadôr che pe prime volte al cjale il sît. O pensi che chest al sedi il motîf di chescj ricognossiments: al è râr di fat che progjets web istituzionâls de publiche aministrazion a vedin chestis carateristichis tipichis de comunicazion plui avanzade".

Ae decime setime edizion dal premi a àn partecipât 772 progjets di comunicazion e 121 agenziis, tamesâts di une jurie formade di 142 membris.

Il sît de ARLeF nol è gnûf a ricognossiments nazionâls. Cualchi mêis indaûr al jere stât selezionât tant che finalist te categorie "Copy writing Award", in ocasion de decime prime edizion dal "Premi Web Italie", apontament tra i plui innomenâts dal setôr.

Il sît bilengâl de Agenzie al jere stât candidât te categorie "Pubbliche amministrazion" che però e je stade scancelade parcè che a mancjavin altris candidaturis, fasint slontanâ la pussibilitât di cjapâ une medaie pe ARLeF.

Lis carateristichis di facilitât e cualitât dai contignûts dai tescj dal sît ARLeF a son stadis cussì preseadis de jurie tant di fâlu inserî intune altre categorie, dongje grandis aziendis tant che Illy e Kinder.